




Broj  
76

juni/juli 2016. • List RMU "BANOVIĆI"  
BESPLATAN PRIMJERAK

# RUDAR



**TERMOELEKTRANA BANOVIĆI**

**Potpisano Mandatno pismo između  
Rudnika i kineske ICBC banke**



PROIZVODNJA UGLJA I OTKRIVKE

# PREBAČENA PROIZVODNJA UGLJA I OTKRIVKE NA KUMULATIVNOM NIVOU

Nakon veoma dobrih proizvodnih rezultata u prva tri mjeseca ove godine uslijedio je očekivani pad proizvodnje uglja u aprilu i maju.

Prema zvaničnim podacima u mjesecu aprilu proizvodnja uglja ostvarena je sa 94,49%, a u mjesecu maju za 3% više, proizvedeno je 117.954 tona separisanog uglja. Sumirajući rezultate od početka godine za pet mjeseci proizvedeno je 639.549,70 tona separisanog uglja, što je u konačnici 1,7% više u odnosu na planirane vrijednosti za ovaj period godine.

Kada je riječ o otkrivci u posljednja dva mjeseca realizovana je preko mjesečnih i godišnjih parametara. U aprilu je prebačeno oko 1,61%, odnosno 15.280 metara kubnih čvrste mase, dok je u maju plan prebačen za 16,30%, odnosno proizvedeno je 150.354 metara kubnih čvrste mase.

Optimističan je i mjesec juni obzirom da je za dvadeset i dva dana proizvedeno 74.249 tona separisanog uglja i realizovano 112,8% otkrivke.

Cjelokupni rezultati proizvodnje uglja i otkrivke su više nego zadovoljavajući uzme li se u obzir doba godine u kojem se bilježe. Poznato je da tržište u ovo vrijeme nikada nije bilo naklonjeno.

Najkritičniji period je prošao a za ono što slijedi potrebna je maksimalna pripremljenost. Juli, odnosno avgust mjeseci su povećane potražnje za ugljem u širokoj potrošnji i tada je veoma važno dobro startati i adekvatno odgovoriti na zahtjeve.

Prostom računom vidljivo je da se realno planiralo i računalo na smanjeni plasman u prvom dijelu godine. Istini za volju ovaj put ispunjenje godišnjeg plana ne bi trebalo biti upitno obzirom da se ne vuku zaostaci a i raspoloživost mehanizacije je na zadovoljavajućem nivou.





TERMoeLEKTRANA BANOVICI

# DEFINISANI USLOVI FINANSIRANJA ZA 85% VRIJEDNOSTI EPC UGOVORA

Mandatno pismo između Rudnika i Industrial and Commercial bank of China potpisano je 02. juna 2016. godine u Kini, kojim su definisani i usaglašeni najbitniji uslovi finansiranja za 85% vrijednosti EPC Ugovora – potvrdio je Avdija Mumić predsjednik Stručne komisije za praćenje i izgradnju termoelektrane i cementare u Banovićima.

Aktivnosti na ovom projektu ne prestaju, ostao je još samo korak do potpisivanja konačnog Ugovora i mogućnosti da se krene u izgradnju jednog od najvećih projekata u Bosni i Hercegovini. Detalje i pregovore oko konačnog Ugovora u narednom periodu vršiće Komisija zajedno sa Konsultantskom kućom, predstavnicima banaka i osiguravajuće kuće. I ovaj korak kao i do sada prati Vlada i Parlament FBiH koji će na kraju donijeti odluku o davanju saglasnosti na ove aktivnosti, što bi značilo zatvaranje procesa finansiranja za 85% vrijednosti EPC Ugovora.

Obzirom da je u kratkom vremenskom periodu potrebno obezbijediti i ostalih 15% vrijednosti EPC Ugovora neophodno je obaviti pregovore sa domaćim i stranim finansijskim institucijama. Taj proces bi se trebao okončati u naredna dva mjeseca.

Dok se žustro vode pregovori oko finansiranja projekta gradnje Termoelektrane, na terenu se aktivno radi i na uređenju prostora. U toku su radovi na izmještanju dalekovoda za koje je prikupljena sva potrebna dokumentacija za nesmetano priključivanje na mrežu. Radovi će trajati oko mjesec dana, nakon čega započinje nivelacija terena.

Sve predradnje moraju biti gotove do trenutka kada se završi ciklus obezbijedivanja finansija, potrebno je stvoriti uslove da se do kraja godine nesmetano krene u izgradnju Termoelektrane.

## Za cementaru Banovići 488,6 miliona KM

Kada je u pitanu oblast energetike, za projekte iz oblasti namjenske industrije predviđeno je ulaganje 67.000.000 KM. Ulaganja su predviđena u firme „Unis-Ginex“, „Pretis“, „Zrak“, „Binas“, BNT i „Vitezit“.

Na listi prioriteta su i ulaganja u cementaru Banovići u vrijednosti od 488.600.000 KM. Za gradnju i modernizaciju poslovno-industrijskih zona predviđeno je 40.000.000 KM.

Strategija ravoja Rudnika prerasla je iz ideje u Ugovore i saglasnosti koji bi do kraja godine trebali dati finalne rezultate, odnosno početak gradnje energetskog objekta vrijednog oko milijardu konvertibilnih maraka.

### Studija o izgradnji deponije šljake i pepela

Ministarstvo za okoliš i turizam FBiH tokom mjeseca maja u zgradi Općine Banovići održalo je javnu raspravu o ocjeni izmijenjene i dopunjene studije o procjeni utjecaja na okoliš u postupku izdavanja okolišne dozvole. Dozvola je potrebna za izgradnju deponije šljake i pepela iz TE Banovići u krater PK „Čubrić“ u Banovićima i neće imati štetni uticaj na stanovništvo, potvrdila je struka. Sa ovim su saglasni i predstavnici građana, službi i Instituta za zaštitu okoliša.

Studiju je izradio Institut za zaštitu, ekologiju i obrazovanje d.d. Tuzla, a ona je u svakom dijelu pokazala pozitivan efekat samim tim što se radi o jednoj od najmodernijih tehnika. Svi standardi iz oblasti ekologije usklađeni su sa standardima EU.



PODZEMNA EKSPLOATACIJA UGLJA

# U JULU EKSPLOATACIJA NOVOG OTKOPNOG POLJA, DO KRAJA GODINE I NOVA OPREMA

Nakon završetka godine u kojoj je zabilježena najveća proizvodnja u poslijeratnom periodu u pogonu „Podzemna eksploatacija uglja“ aktivno se radi na pripremama otkopnih polja, odnosno premještanju širokog mehanizovanog čela u novo otkopno polje, obzirom da je mehanizovana eksploatacija otkopnog polja završena tokom prve sedmice mjeseca marta. Iako je bilo predviđeno da se do mjeseca aprila okončaju poslovi premještanja, zbog nesretnog slučaja koji se desio u jami početkom marta i nedostatka čelične lučne podgrade radovi su krenuli nešto kasnije. Završetak pripremljenih radova i početak eksploatacije novog otkopnog polja očekuje se polovinom jula.

Tehnički rukovodilac „Podzemne eksploatacije uglja“ Vahidin Aganović osim o trenutnim aktivnostima govorio je i o razvojnim planovima u ovom pogonu. Sa izgradnjom buduće termoelektrane u Banovićima očekuje se i povećanje jamske proizvodnje uglja, te je u narednom periodu nužno provesti niz ozbiljnih radova i investicija. Do 2020. godine u ovaj pogon potrebno je uložiti oko 50 miliona KM kako bi se radilo na izradi i rekonstrukciji prostorija i trakastih transportera, te proširenju kapaciteta bunkera. Jedan od najznačajnijih koraka u ovom projektu svakako je istraživanje revira sjever, te nabavka nove opreme, odnosno još jednog širokog mehanizovanog čela.

Revir sjever je i ranije istraživao u dužini od nekoliko stotina metara, ali je potrebno istražiti još najmanje 2.500 metara kako bi se tačno utvrdio broj otkopnih polja, širina i dužina, te zastupljenost rasjeda. Nakon toga na istraženom prostoru biće ugrađeno novo široko mehanizovano čelo, što će značiti i potpunu mehanizaciju „Podzemne eksploatacije uglja“. Aktivnosti na povećanju jamskog kapaciteta su već počele pokretanjem postupka za nabavku još jedne mašine za izradu jamskih prostorija, dva trakasta i četiri grabuljasta transportera. Isporuca opreme očekuje se do kraja godine čime će se obezbijediti potpuno nova, sigurna i neistrošena transportna linija.





## SEPARACIJA

# SVE SPREMNO ZA POČETAK SEZONE, OBAVLJENI VELIKI REMONTI

U pogonu „Separacija“ u mjesecu junu završen je veliki remont na starim i dotrajanim mašinama. U zastoju koji je trajao tri smjene obavljani su obimni i zahtjevni poslovi rađeni na zamjeni dijela mašine taložnice i čišćenja taložnog bazena. Uporedo se radilo i na sanaciji vage na utovaru, odnosno dijelu betonskih radova i sanaciji mašinske konstrukcije. Radovi na sanaciji vage trajali su nešto duže al na svu sreću nisu ometali proces proizvodnje, prije svega zbog dobre organizovanosti i rasporeda, ali i smanjene potražnje kocke i oraha u ovom periodu.

Remont ovakvog tipa bio je neophodan zbog činjenice da se u drugom dijelu godine čeka znatno veća potražnja za ugljem.

Trideset i dva sata predanog rada i maksimalne angažovanosti radnika na postavljenim zadacima doprinijeli su da se radovi završe na vrijeme bez ijedne nepredviđene situacije, i ono što je najvažnije, bez ijedne povrede.

Kontrolu nad pomenutim radovima, kao i dugi niz godina imao je Rifet Husić, poslovođa mašinskog održavanja na „Separaciji“. Jedan od najstarijih zaposlenika na ovom pogonu ispričao je sve o poslovima koji se trenutno obavljaju, ali se kroz razgovor dotakao životnog i radnog iskustva provedenog u Rudniku od davne 1975. godine kada je kao zavarivač prvi put došao u pogon. Sada je vrijeme za penziju, iako je nekad jedva čekao, danas kada je taj momenat sve bliže, kaže, nije mu lako. Teško će ostaviti sve što je radio preko četrdeset godina i ljude sa kojima je volio raditi. Na poslu je znao

provoditi i 48 sati, bio je svjedok dobrih i loših dana u Rudniku. I sada zna kada se proizvodilo najviše a kada najmanje uglja, pred njegovim očima mijenjala se Separacija ali i generacije.

Smatra da posao u ovom pogonu nije jednostavan.

- Na Separaciji se odvijaju najsloženiji procesi od kojih zavisi čitava proizvodnja, jer Separacija je jedna mašina i ako stane, onda staje sve. Iako naizgled jednostavan, u stvari je to jedan složen proizvodni sistem, zaključio je Husić.



Sva mašinska postrojenja u ovom pogonu održavaju 53 radno sposobna zaposlenika, koji su bili zaduženi i za zadnji remont, odnosno za poslove na zamjeni dotrajalih podova drobilice, zamjeni lijevka mašine taložnice, sanaciji vage i svih drugih poslova obuhvaćenih remontom.

Rukovodstvo ovog pogona smatra da će se u narednom periodu separisanje i oplemenjivanje uglja vršiti bez većih problema i zastoja, te da će se pribjegavati isključivo standardnom održavanju postrojenja bez narušavanja plana proizvodnje uglja.



Realizacija kapitalnih investicija Općine Banovići za period 2013. - 2017.

# VELIKA ULAGANJA SE NASTAVLJAJU

## Uskoro izgradnja prvog kružnog toka. Određena lokacija za poduzetničku zonu.

Plan kapitalnih investicija Općine Banovići predstavlja okvirni srednjoročni plan ulaganja u infrastrukturne projekte kojima se nastoji poboljšati stanje javnog i društvenog dobra na području općine Banovići. Općinsko vijeće Banovići u junu 2014. godine usvojilo je Listu kapitalnih projekata Općine Banovići za period 2013. – 2017. godina na kojoj se nalaze 62 projekta.

U skladu sa finansijskim mogućnostima i redosljedom završetka tendera i procedura javnih nabavki do sada je završeno oko 30 većih projekata. U okviru ovih projekata položeno je šest kilometara asfalta, izgrađeno nekoliko vodovoda i objekata mjesnih zajednica, izgrađeni su novi mostovi i pomoćni zidovi, te uređena javna rasvjeta. Izvršeno je redovno godišnje održavanje puteva i sanacija oštećenih lokalnih putnih pravaca, te urađene značajne intervencije po mjesnim zajednicama. U protekle dvije godine iz općinskog budžeta je za infrastrukturne projekte uloženo milion konvertibilnih maraka. U narednom periodu Općina planira uložiti još tri miliona u izgradnju, od čega dva planira povući od viših nivoa vlasti.



načelnik Midhat Husić.

Ovih dana završeno je asfaltiranje makadamskih puteva u mjesnim zajednicama Podgorje i Stražbenica, a u toku su radovi na još nekoliko projekata.

- U toku je izgradnja kanalizacione mreže u mjesnoj zajednici Podgorje u dužini od tri kilometra, izgradnja vodovodne mreže u Zoni B, uređenje korita rijeke Litva pored zgrade Općine, te pripremni radovi za asfaltiranje puta u ulici Kulina Bana - kazao je načelnik Husić.

- Pored toga veliki broj tendera je u toku i naredni mjesec dana očekujemo okončanje ovih procedura i početak realizacije još trideset projekata na području općine Banovići - dodao je Husić.

Najveći infrastrukturni projekat koji se planira realizovati tokom 2016. godine na području Banovića je izgradnja savremene saobraćajnice – kružnog toka na lokaciji kod autobuske stanice. Početak realizacije ovog projekta očekuje se u julu 2016. godine a





planirano je da se kompletan projekat završi do kraja 2016. godine. Ovo je prva saobraćajnica ovakve vrste na području Banovića i ona će doprinijeti povećanoj sigurnosti u saobraćaju s obzirom da bi trebala značajno smanjiti gužve na ovom dijelu saobraćajnice. Radove na poslovima izgradnje kružnog toka izvodit će firma „Rial-Šped“ d.o.o. Doboj Istok, a ukupna vrijednost projekta je oko 1.400.000 konvertibilnih maraka, potvrdio je Amir Mrkonjić, pomoćnik Općinskog načelnika.



### Poduzetnička zona na lokaciji Sadnice

Općina Banovići i RMU "Banovići" d.d. Banovići usaglasili su se da za poduzetničku zonu odrede zemljište na lokaciji Sadnice, na putu prema Banovići Selu na kojem se trenutno nalazi rudnička rekultivacija. Potvrđeno je to odlukama i aktima na posljednjoj sjednici Općinskog vijeća, a uskoro će aktima Rudnika zemljište biti prenešeno na Općinu. Intencija Općine je da se zemljište u poduzetničkoj zoni dodjeljuje besplatno zainteresovanim poduzetnicima.

**Sanela Ikanović**

U NAREDNE ČETIRI GODINE UPRAVA RUDNIKA  
ĆE RADITI U NEŠTO IZMIJENJENOM SASTAVU

## PROMJENE NA POZICIJAMA IZVRŠNOG DIREKTORA ZA INVESTICIJE I RAZVOJ I IZVRŠNOG DIREKTORA EKONOMSKIH POSLOVA

Prema prethodnoj saglasnosti Vlade FBiH na osamnaestoj sjednici Nadzornog odbora rudnika „Banovići“ imenovana je nova Uprava Društva. Kako je u ovom slučaju i potvrđeno uspješno preduzeće trebaju voditi i predstavljati ljudi koji su ga stvorili uspješnim. I baš zbog toga ni ovaj put u odabiru nije bilo značajnijih promjena. Na čelo direktora Rudnika četvrti mandat za redom imenovan je dr. Munever Čeragić, dipl.ing.rud. Promjena nije bilo ni kada je u pitanju imenovanje izvršnog direktora za tehničke poslove i izvršnog direktora za pravne poslove. U naredne četiri godine na poziciji tehničkog direktora i dalje ostaje dr. Ibrahim Lapandić dipl.ing.rud., a Zlata Junuzović dipl. pravnik na funkciji izvršnog direktora za pravne poslove.

Prije dvanaest godina preuzeli su vodstvo nad Rudnikom i napravili impresivne rezultate, odnosno jedno od uspješnijih preduzeća u državi. Od početka njihovog upravljanja Rudnik pozitivno posluje, iz godine u godinu zapošljava nove ljude, planira, ali i realizuje. Strateški projekti, razvoj preduzeća, razvoj zajednice, njihovi su primarni zadaci. Zbog toga su i dobili zasluženu priliku da privedu kraju najveće razvojne projekte čiju su realizaciju sami započeli.

Promjene su se desile kada je u pitanju mjesto izvršnog direktora za investicije i razvoj novih djelatnosti. U naredne četiri godine tu funkciju obnašat će Elvir Jamaković dipl.ing.rud., dok je na mjesto izvršnog direktora za ekonomske poslove izabrana Razija Begić dipl.ecc i to u funkciji VD direktora najduže do 6 mjeseci. Do zatvaranja konkursa na mjesto izvršnog direktora za ekonomske poslove nije bilo pristiglih prijava.

Nadzorni odbor razriješio je dužnosti staru Upravu, a novoizabranoj poželio uspješan rad i dobru saradnju, u nadi da će svoju funkciju obavljati uspješno i savjesno.

Nova – stara Uprava sa radom je startovala 15. maja 2016. godine. Jedni su nastavili gdje su stali, a drugi će nadamo se uz brzu prilagodbu rame uz rame s njima.

INFORMACIJA U VEZI POREZNIH KARTICA ZA RADNIKE RMU „BANOVIĆI“, D.D. BANOVIĆI

# ŠTA JE POREZNA KARTICA?

## KOJA PRAVA RADNICI IMAJU NA OSNOVU POREZNE KARTICE?



**P**orezna kartica je dokument kojim se u skladu sa članom 24. Zakona o porezu na dohodak FBiH dokazuje pravo za korištenje ličnog odbitka i povećanja plaće po tom osnovu, odnosno umanjena osnovice za oporezivanje dohotka.

Poreznu karticu besplatno izdaje Porezna uprava na osnovu ličnog zahtjeva radnika.

Pravo na umanjene osnovice za obračun mjesečne akontacije poreza na dohodak radnik stiže na osnovu svoje Porezne kartice, koju je dostavio poslodavcu.

Lice koje tek zasniva radni odnos, kako bi ostvarilo pravo na lični odbitak prilikom uređivanja osnovice za obračun akontacije poreza na plaću, dužno je odmah po zasnivanju radnog odnosa Poreznoj upravi podnijeti popunjeni pismeni zahtjev i odgovarajuću vjerodostojnu dokumentaciju o izdržavanim članovima uže porodice i/ili invaliditetu, na osnovu koje će Porezna uprava utvrditi ukupan faktor ličnog odbitka koji će se iskazati u Poreznoj kartici poreznog obveznika.

Na osnovu člana 24. Zakona o porezu na dohodak FBiH radnik ima pravo na osnovni lični odbitak u visini od 300,00 KM mjesečno i lični odbitak za izdržavane članove uže porodice kako slijedi:

- 0,5 za bračnog druga, kao i za bivšeg bračnog druga kojem plaća alimentaciju (150,00 KM mjesečno)

- 0,5 za prvo dijete (150,00 KM mjesečno)
- 0,7 za drugo dijete (210,00 KM mjesečno)
- 0,9 za treće i svako naredno dijete (270,00 KM mjesečno)
- 0,3 za drugog člana uže porodice (90,00 KM mjesečno)
- 0,3 za utvrđenu invalidnost poreznog obveznika i svakog člana uže porodice koje porezni obveznik izdržava (90,00 KM mjesečno)

Izmjene u porodičnom stanju radnika koje utiču na smanjenje faktora ličnog odbitka odnosno na povećanje osnovice za obračun mjesečnih akontacija poreza, radnik je dužan prijaviti Poreznoj upravi u roku od 15 dana od dana nastanka izmjene prema slijedećoj proceduri:

1. u Službi za kadrovske poslove Organizacione jedinice u kojoj je zaposlen tražit će da mu se privremeno izda Porezna kartica radi upisa promjena ličnih podataka i podataka o ličnom odbitku u Poreznoj upravi,
2. Poreznoj upravi izdaje zahtjev za upis promjena na Poreznoj kartici uz odgovarajuću dokumentaciju i ranije izdatu Poreznu karticu,
3. Porezna uprava ponovo izdaje Poreznu karticu sa novom vrijednošću koeficijenta ličnog odbitka,
4. novu Poreznu karticu radnik dostavlja u Službu za kadrovske poslove u O.J. „Direkcija“ radi evidentiranja a zatim u Službu za kadrovske poslove Organizacione jedinice u kojoj je zaposlen.

Radniku koji ne dostavi svoju Poreznu karticu poslodavcu, porez na dohodak obračunava se u skladu sa članom 9. Zakona o porezu na dohodak po stopi 10% na ukupan iznos ostvarenog dohotka bez umanjena za osnovni lični odbitak i lični odbitak za izdržavane članove uže porodice.

Rukovodilac Službe za kadrovske poslove

  
Ismet Alić, dipl. pravnik



# ENERGA

7-9  
JUNI/LIPANJ  
2016

SAJAM "ENERGA 2016"  
I OVE GODINE OPRAVDAO OČEKIVANJA

## PREZENTIRANE AKTIVNOSTI NA PROJEKTIMA IZGRADNJE TERMoeLEKTRANE I CEMENTARE

Sajam „Energa 2016“ i ove godine okupio je najjemenitnije stručnjake iz oblasti energetike industrije i rudarstva. U sportsko kulturno - privrednom centru Mejdan Tuzla od 7. do 9. juna održan je poslovni sajam na kojem je prisustvovalo više od stotinu izlagača iz zemlje i inostranstva. Prema mišljenjima učesnika i ovaj put je opravdao sva očekivanja. Bila je to još jedna prilika za susret inostranih i domaćih kompanija, razmjenu mišljenja i dostignuća te uspostavljanje poslovne saradnje. Zemlja partner ove godine bila je Republika Češka koja je na sajmu predstavila 19 kompanija. Sajam su otvorili premijer Tuzlanskog kantona Bego Gutić i veleposlanik Republike Češke u BiH Jakub Sklanik. U svom obraćanju premijer je izmeđuostalog rekao kako su projekti izgradnje termoelektrane i cementare u Banovićima, te bloka 7 u Tuzli jedan od bitnijih razloga za izlagače koji su ove godine došli u Tuzlu. Po njegovom

mišljenju, dogodine kada budu postavljeni kameni temeljci ovih projekata, biće još više kompanija koje će imati motiv doći.

Kao i svake godine na najvećem sajmu iz ove oblasti učestvovala je i rudnik „Banovići“. Dobro uigrana ekipa potrudila se da svoje projekte transparentno predstavi znatiželjnim posjetiocima koje je s razlogom najviše zanimao razvoj projekta izgradnje termoelektrane i cementare u Banovićima. Prepoznavši dobru priliku mnogi od njih su razmatrali i mogućnost saradnje, nudeći svoje proizvode i usluge. Do novog okupljanja stručnjaka iz ove oblasti na projektima termoelektrane Banovići desice se značajne promjene, odnosno početak gradnje, što će privući još više pažnje i dati više razloga za sklapanje novih poslovnih suradnji.

Za uspješan nastup i prezentaciju trećeg dana sajma predstavnici Rudnika dobili su i priznanje.



NIJAZ ČOLIĆ

# Vizija svijeta kroz „pero“ rudara



Nijaz Čolić iz Grivica rudar je i zaposlenik Rudnika Banovići, među svojim kolegama je već sada poznat kao pjesnik. Bio bi poznat i šire da sugrađani znaju da je autor dobro nam znane pjesme. Ako pitate građane Banovića o pjesmi posvećenoj Mirsadu Kukiću, svi će znati o kojoj pjesmi se radi, oni hrabriji možda i zapjevati, ali jedno je sigurno, malo ko će znati da je baš on autor teksta koji je obradila i otpjevala izvorna grupa braća Bojići. Ovaj samouki pjesnik napisao je preko 500 pjesama, nešto manje sačuvao a još manje prodao. Inspiraciju pronalazi u različitim životnim situacijama, a ona vječita svakako su Banovići i Rudnik. Nijaz pjesme piše još od srednje škole putem kojih prenosi svoje

emocije i zapažanja. Uzora nema, piše u momentu kada za to dobije inspiraciju. Tema njegovih pjesama često su kolege komorati, njihovo ponašanje i međuljudski odnosi. Naravno neizostavna je i prevrtljiva politička scena, ali i svjetlije teme, kao što su ljepote planine Konjuh te jedinstvena i nadaleko čuvena banovićka parna mašina. Pjesme ne prodaje i nema namjeru, poneku pokloni prijateljima, ili je napiše isključivo za njih, a sve druge putem društvenih mreža plasira široj javnosti. Od teškog posla i svakodnevnice liječi se pjesmom i kaže da tih par minuta, koliko mu je potrebno da bi napisao pjesmu neizmjereno uživa.

Za sve vas objavljujemo neke od njegovih radova:

## PJESMA O PARNJAČI

Od Oskove pa sve do Bešina i  
Još pjesmu pjeva parnjača mašina  
Aktivne su još uvijek parnjače stare  
I sa njima još se zarađuju pare

Još me ljudi žarka želja mine  
Kada vidim da se one dime  
Pa se sjetim starih uspomena  
Što u svijetu nigdje više nema

Svakim danom sve se više gase  
Dizelke su kaže bolje klase  
Al vjerujte da me želja mine  
Kad parnjača pored mene svirne

Banovići zakletvu su dali  
I vjerujte još su sačuvali  
Turizam nam sada ovdje cvijeta  
I po zimi i u pola ljeta

Dodite nam prijatelji mili  
Što se niste s parnjačom vozili  
Da vidite kakva je ljepota  
Dok parnjača u krivini mota

Ne može se pjesmom opisati  
Tu se mora dobro uživati  
Da se sjetiš tih starih vremena  
To ostaje vječna uspomena

## PLANINA KONJUH

Lijepa je ljudi ta Konjuh planina  
Ovdje svako može da uživa  
Od Krivaje sve do Muške vode  
Izletište zdrave je prirode

Od Nišića do Ozrena brate  
Ko je blizu neka se navrate  
Ovdje možeš naći sebi lijeka  
Neće tebi trebat apoteka

Priroda nam ovdje bilje čuva  
Vjetar hladan sa Nišića duva  
Bilje cvjeta i lijepo miriše  
Sve što vidiš ovdje zdravo diše

Ovdje sele ko da si u raj  
Pridruži se i ti našem kraju  
Nek se znade u čitavom svijetu  
Najljepše je mjesto na planetu





BANOVIČKI „CIRO“ ODUŠEVIO ENGLEZE

# INTERESOVANJE NE JENJAVA, SVE ČEŠĆE SE ČUJE ZVUK PARNJAČE

Mnogo puta do sada pisali smo o turističkim potencijalima Banovića sa posebnim naglaskom na popularnog „Ciru“, ali svaki put nas, posebno u ovo doba godine, iznenade masovne posjete ljubitelja parnjača iz svih dijelova svijeta. I baš zbog toga iz godine u godinu razgovaramo sa novim turistima i prenosimo njihove utiske. Svi oni kažu da je Ciro nešto jedinstveno u svijetu, da ovakvo iskustvo još nisu doživjeli, a ono čemu se najviše dive su stare lokomotive koje i poslije 60 godina rada nisu u „penziji“.

Već dugo vremena turistička agencija Astra Travel iz Beograda organizuje posjete Banovićima nekoliko puta godišnje. Najvjerniji klijenti su Englezi. Tako je bilo i ovaj put, u mjesecu junu njih trideset pod turističkom palicom Janeza Smole četiri dana uživalo je na unikatnim Rudničkim lokomotivama.

Putovanje uskotračnom prugom započeli su u Sloveniji, a kruna putovanja bili su Banovići gdje su se najduže i zadržali. Oduševljene



nisu krili, impresionirao ih je bogat turistički program. Mnogi od njih oduševljeno su gledali ono o čemu su imali priliku samo slušati od svojih kolega koji su ranije bili ovdje.

Banovičke parnjače iako proizvedene davne 1947. godine, sa pozamašnim radnim vijekom iza sebe, čadave i hrđave ovim ljudima beskrajno su zanimljive. Lokomotive 83-ke ali i jedina sačuvana u svijetu 19-12 svakako su privukle najviše pažnje.

Vožnju ovakvim lokomotivama doživljavaju na svojevrsan način.



- Ovdje je predivno, svaka vam čast. Prvi put sam tu i fantastično se osjećam. Ova vožnja je bila posebno iskustvo. Veliki smo ljubitelji lokomotiva, mi ne putujemo vozovima, mi se igramo s njima. Ovo su igračke za velike dječake, za turiste – rekao je Keith Ollright ne krijući svoje oduševljenje.

Keith je došao sa kolegama vidjeti lokomotive unikate i kako kaže

prezadovoljan je ponuđenim programom. Brilljantno, bila je njegova najčešće izgovorena riječ.

U neobaveznom razgovoru saznali smo da je ovo jedna od najpoznatijih turističkih grupa u Engleskoj. Imaju svoje klubove i stalna druženja na kojima razmjenjuju međusobna iskustva sa putovanja. Fotografije i filmove aktivno dijele na društvenim mrežama i tako jedni drugima preporučuju atraktivna turistička mjesta.

Da su Banovići na toj listi i da je zadovoljan turist najbolja reklama, potvrđuje i činjenica da se Englezi iz godine u godinu u sve većem broju vraćaju u naš grad.

## IMPRESUM

**RUDAR informativna novina radnika  
RMU "Banovići" d.d. Banovići**

### Uređuje redakcioni odbor:

Samir Numanović, predsjednik  
Amela Kantić, urednica  
Melisa Čaušević, novinar- saradnik  
Fertik Glibanović  
Amir Halilčević  
Salko Gutić  
Rasim Užičanin  
Šehval Lapandić

**DTP i štampa:** "OFF SET" Tuzla

Riješenjem Republičkog komiteta  
za informacije broj 04-651-537/77  
od 6.9.1977.

List je uveden u Registar štampe R BiH.

**E-mail:** kontakt@rumb.ba  
nadzorni.odbor@rumb.ba

[www.rmub.ba](http://www.rmub.ba)



# SEZONA U JEKU, SVE VIŠE ZADOVOLJNIH GOSTIJU

Najposjećenije mjesto u ovo doba godine na području općine Banovići svakako je hotel „Zlača“ koji datira još od rane 1979. godine kao dom za odmor i rekreaciju. Nekada hotel lokalnog tipa, čije su usluge uglavnom koristili zaposlenici Rudnika vremenom postaje oaza za posjetitelje iz cijele države pa i izvan nje. Po kvaliteti ponude ali i same lokacije hotel „Zlača“ danas parira svjetskim odmaralištima, i već trideset i sedam godina atraktivno je mjesto za odmor, rekreaciju i relaksaciju.

Obiluje povoljnim klimatskim uslovima, čistim okolišem,

rasprostranjenim zelenim površinama, raznovrsnom gastro ponudom, uz uvijek raspoloženo i ljubazno osoblje. Značajno je udaljeno od velikih zagađivača zraka što dodatno doprinosi odmoru i uživanju posjetitelja.

Obzirom da je od 2009. godine dio područja planine Konjuh, a sa njim i područje hotela „Zlača“, izglasan za zaštićeni pejzaž, dodatno se pridaje pažnja uređenju i poboljšanju ponuda. Već sada na ovom izletištu postoje mnogo atraktivniji sadržaji za izletnike. U sklopu odmarališta „Zlača“ nalaze se šadrvani, stolovi, igralište za najmlađe, tereni za fudbal, odbojku, košarku, kao

i staze za bicikliste i šetače, te turistički vodiči. Pogodno je i za časove škole u prirodi, seminare, dječije ekskurzije. Međutim, posjetitelji mogu i jednostavnom šetnjom zadovoljiti svoja najača čula i napuniti baterije nakon napornog dana.

Brojnije posjete ovom mjestu počele su već odavno. „Planinska ljepotica“ kako često nazivaju Zlaču, idealna je za odmor, pa zato i ne čudi što je sa prvim naznakama toplijeg vremena u potpunosti ispunjena. Posjetitelji željni promjene i istinske prirodne ljepote i ove godine povjerenje su ukazali zlatnom jezgru banovičke Općine.

